

## ՅԵՏԱԶԳԵԼ ԵՒ ՄԻԱՍԻՆ ՏՕՆԵԼ

—

Էջմիածինը շրջաբերական կարգադրութիւն է արել՝ Հայկական տպագրութեան 400-ամեակը և հայոց տառերի գիւտի 1500-ամեակը տօնել հոկտեմբերի 13-ին:

Այժմ հարց է առաջ եկել, պէտք է ամեն տեղ էջմիածնի հետ միաժամանակ տօնել, թէ՛ զանազան տեղեր զանազան ժամանակ. Եւ զանազան ժամանակ ասելով՝ առ այժմ գոնէ՛ հասկանում են մի ամիս տարբերութիւն— նոյեմբերին, ինչպէս որոշել է Թիֆլիզի Յանձնաժողովը:

Արդ, ինչ է լինելու օգուտը, եթէ կաթողիկոսը ետ վերցնի իր կարգադրութիւնը և մի ամսից յետոյ տօնենք, կամ թէ չէ տօնենք ջուկ-ջուկ: Ինչ է կատարելու էդ մի ամուսյ ընթացքում, եթէ էսքան ամիսների ընթացքում ոչինչ չի կատարել: Ոչինչ, միանգամայն ոչինչ:

Յիրաւի, երբ դեռ ժամանակ կար, կարելի էր, որ քաղաքներն ու յանձնաժողովները յարաբերութեան մէջ մտնէին, կարծիքներ ու առաջարկութիւններ փոխանակէին, մի եզրակացութեան գային, ծրագիր մշակէին. բայց էդ չի արւած: Մի ժամանակ լինէր որոշւած ընդհանուրի համաձայնութեամբ ու ընդհանուրի համար և մի նպատակ. այնուհետև ամեն տեղ կարող էին ունենալ և իրենց առանձին պայմաններն ու խնդիրները: Չի արւած էն, ինչ որ պէտք է անւէր, այսինքն միասին տօնել մի համազգային տօն, այժմ ուղում են անել էն, ինչ որ չպէտք է անել, անջատ-անջատ էստեղ էնտեղ զանազան ժամանակներ ջգրու հանդէսներ սարքել: Ապարդիւն ու տգեղ:

Միակ ելքն է յետաձգել մի վեց ամսով կամ մի տարով, էդ ժամանակի ընթացքում լուրջ պատրաստութիւն տեսնել և տօնը կատարել վայելուչ շրջադրութեամբ ու իմաստուն կերպով ամեն տեղ միաժամանակ ու միասին: